

Muungano Pamoja na Kristo,

Bali mvaeni Bwana Yesu Kristo, wala msiuangelie mwili, hata kuwasha tamaa zake. Warumi 13:14.

Ili kutimiza wokovu wa wanadamu, Mungu hutumia njia mbalimbali. Anazungumza nao kwa neno Lake na kwa wahudumu Wake, Yeye hutuma kwa njia ya Roho Mtakatifu ujumbe wa onyo, wa karipio na wa maelekezo. Njia hizi zimekusudiwa kuangaza ufahamu wa watu, kuwadhihirishia wajibu wao na dhambi zao na baraka ambazo wanaweza kupokea; kuamsha ndani yao hisia ya uhitaji wa kiroho, ili wapate kumwendea Kristo na kupata ndani Yake neema wanayoihitaji...

Kila mtu binafsi, kwa tendo lake mwenyewe, ama anamwondoa Kristo kwake kwa kukataa kuthamini roho Yake na kufuata mfano Wake, au anaingia katika umoja binafsi na Kristo kwa kujinyima, imani na utii. Ni lazima sisi, kila mmoja kwa ajili yake mwenyewe, amchague Kristo, kwa sababu Yeye alitangulia kutuchagua. Muungano huu na Kristo unapaswa kutengenezwa na wale ambao kwa asili wana uadui Naye. Ni uhusiano wa utegemezi kamili, ambao moyo wenye kiburi unapaswa kuuingia. Hii ni kazi ya siri na wengi wanaokiri kuwa wafuasi wa Kristo hawajui lolote kuhusu. Wanamkiri Mwokozi kwa jina tu, lakini si kama mtawala pekee wa mioyo yao...

Kuukana utashi wao wenyewe, labda kitu walichokichagua kuwa lengo la upendo wao au kuwa kazi yao, kunahitaji jitihada, ambazo kwa ajili ya hizo wengi huingiwa na wasiwasi na kusita na kugeuka nyuma. Lakini vita hivi ni lazima vipiganwe na kila moyo ambao umeongoka kweli kweli. Ni lazima tupambane na majaribu ya nje na ya ndani. Ni lazima tupate ushindi juu ya nafsi, tuyasulubishe mapenzi na tamaa; na hapo ndipo muungano wa roho na Kristo huanza.... Baada ya muungano huu kutengenezwa, unaweza kuhifadhiwa tu kwa jitihada endelevu, za dhati na za uangalifu. Kristo hutumia uweza Wake kuhifadhi na kulinda kifungo hiki kitakatifu na mwenye dhambi yule mtegemezi, asiyejiweza ni lazima atende sehemu yake kwa nguvu zisizochoka, la sivyo Shetani kwa nguvu zake za kikatili na za hila atamtenganisha na Kristo...

Kuzaliwa kwako, hadhi yako, utajiri wako, vipaji vyako, wema wako, uchaji wako, ukarimu wako,... havitatengeneza kifungo cha muungano kati ya roho yako na Kristo. Uhusiano wako na kanisa ... hautafaa chochote isipokuwa umemwamini Kristo. Haitoshi kuamini kuhusu Yeye. Ni lazima umwamini. Ni lazima uitegemee kabisa neema Yake iokoayo.